

Qalam

KDN 3036

Jamādi al-Awwal 1388 Ogos 1968
Bilangan 214 60 sen.

Perkecualian Bumiputera

Usaha kerajaan membantu ekonomi dan perusahaan bumiputera, sememangnya ada dan sedang dijalankan.

Ini ditujukan bagi meletakkan bumiputera bersaing dengan lain-lain bangsa di dalam berusaha di negeri ini.

Sebaliknya kerajaan berusaha mengadakan kerja-kerja untuk penduduk negeri ini dan kerana itu perusahaan-perusahaan asing yang membuka usaha-usaha baharu diberikan taraf perintis selama lima tahun supaya terlepas daripada dikenakan cukai kerajaan dan peraturan-peraturan yang bakal dikenakan kepada perusahaan-perusahaan asing di negeri ini. Ini bertujuan sebagai menggalakkan.

Di dalam berusaha dan bermula, orang-orang Melayu masih baharu dan masih mentah lagi. Kesulitan-kesulitan yang mereka hadapi banyak dan kerana itu ranjau-ranjau itu mesti dihadapi – bukan sahaja ranjau di dalam perniagaan tetapi juga ranjau-ranjau peraturan dan segala-galanya. Yang demikian itu benarlah penerangan Tuan Syed Nasir bin Ismail dari Dewan Bahasa di dalam ucapannya tatkala menyampaikan hadiah kepada pemenang penjual-penjual buku-buku

Dewan yang terbanyak di dalam bulan

Julai yang lalu dengan berkata

“Saya ada mendengar keluhan beberapa ahli perniagaan Melayu yang menghadapi kesulitan disebabkan oleh:

1. Cukai pendapatan yang tinggi
2. Payah mendapatkan modal atau kemudahan “*over draft*” dari bank-bank.
3. Peraturan serta syarat-syarat perniagaan yang mesti dipatuhi.

“Kepada ahli-ahli perniagaan bukan Melayu yang sudah tetap kedudukannya (*establish*) soal cukai pendapatan, modal dan peraturan-peraturan serta syarat-syarat perniagaan itu tidak menjadi masalah, tetapi kepada orang-orang Melayu yang baharu hendak bermula dan baharu hendak mengecap nikmat kemerdekaan yang diperjuangkannya maka soal-soal itu bukan sahaja menjadi masalah bahkan merupakan suatu pertandingan yang tidak wajar di antara seorang kanak-kanak (yang baharu mencuba-cuba) dengan seorang dewasa (yang sudah ada pengalaman dan kemahiran). Kita sedar bahawa dengan tujuan menggalakkan sesuatu perusahaan maka kerajaan ada memberikan sesuatu perusahaan itu taraf perintis (*pioneer status*) kepada syarikat-syarikat asing dari luar negeri atau tempatan dengan tidak mengenakan cukai pendapatan selama 5 tahun dan kerajaan memberikan lain-lain perlindungan.

“Oleh yang demikian, jika sungguh-sungguh kerajaan hendak menolong bumiputera dalam lapangan perniagaan, saya suka mengesyorkan bahawa tiap-tiap bumiputera yang mengadakan perniagaannya bersendiri hendaklah diberikan taraf perintis

selama 5 tahun dengan diberi kemudahan dan perlindungan seperti yang telah diberikan kepada syarikat-syarikat yang bertaraf perintis. Dengan jalan ini orang-orang Melayu dan bumiputera mendapat galakan bermula dan berpeluang untuk mendapat pengalaman. Orang-orang bukan bumiputera tidak patut iri hati atau membantah kerana ini boleh termasuk dalam bidang hak-hak istimewa orang Melayu seperti yang dijanjikan dalam perlembagaan, dan orang-orang Melayu tidak pernah membantah taraf perintis yang diberikan kepada syarikat-syarikat dan keistimewaan-keistimewaan yang diberikan kepada ahli-ahli perniagaan bukan Melayu selama ini.”

Apa yang dikatakan oleh Syed Nasir itu sememangnya benar. Kerajaan sepatutnya mengecualikan perusahaan-perusahaan bumiputera yang kurang mendapat kemajuan bersebab dengan sebab-sebab yang tersebut itu. Oleh yang demikian sebab-sebab itu patut diperhati dan difikirkan – jika kerajaan berfikir perusahaan itu mahu dibantu.

Tujuan-tujuan kerajaan mahu membantu itu jangan difikirkan atas yang besar sahaja tetapi tiap-tiap yang kecil juga. Tujuan-tujuan kerajaan menyampaikan tujuan ini tidak akan tercapai jika di dalam badan-badan pelaksanaan kerajaan itu terdiri dari pegawai-pegawai yang tidak berpengalaman di dalam perusahaan dan perniagaan – hanya berpengetahuan di dalam ilmu kejurusan perniagaan dan perusahaan sahaja. Jadi kesulitan dan kepayahan yang dihadapi oleh ahli-ahli perniagaan dan perusahaan dan kemajuan orang-orang yang berusaha